

**Ekonomi 2018 tumbuh sihat sebab polisi kerajaan jelas - Guan Eng**  
**Astro Awani**  
**16 Februari 2019**  
**Najib Aroff,**

**KUALA LUMPUR:** Pertumbuhan ekonomi 4.7 peratus pada 2018 dipacu polisi kerajaan yang merombak semula ekonomi negara ke arah pertumbuhan berkualiti tinggi sekaligus mempercepatkan pertumbuhan, kata Menteri Kewangan Lim Guan Eng.

“Dari ukuran suku ke suku tahun, pelaburan awam meningkat sebanyak 44 peratus dalam suku keempat. Perkembangan positif ini dijangka berlanjutan dalam tahun 2019,” katanya.

Guan Eng berkata eksport juga berkembang 1.3 peratus tahun ke tahun pada suku tersebut selepas jatuh 0.8 peratus pada suku ketiga.

“Untuk sepanjang tahun lalu pada harga semasa, eksport barangan kita telah meningkat 6.7% kepada hampir RM1 trilion,” katanya.

Jelas Guan Eng pencapaian itu direkodkan di sebalik ‘perang dagangan’ antara Amerika Syarikat dan China.

Guan Eng berkata inflasi 2018 juga mempunyai purata 1 peratus tahun ke tahun, merupakan kadar terendah yang dicatatkan dalam tempoh 9 tahun.

“Dalam 4 bulan yang pertama di bawah pentadbiran yang terdahulu, purata kadar inflasi ialah 1.7 peratus tahun ke tahun.

“Ini berbeza dengan 8 bulan pertama pentadbiran Pakatan Harapan, apabila ia menurun secara signifikan kepada 0.6 peratus tahun ke tahun,” katanya.

Tambahnya Indeks Harga Pengguna (IHP) menunjukkan pemansuhan Cukai Barang dan Perkhidmatan (GST) bermula Jun 2018 membawa kepada penurunan ketara harga pengguna.

“Pengenalan semula Cukai Jualan dan Perkhidmatan (SST) pada September 2018 tidak membawa kepada peningkatan inflasi secara mendadak dalam bulan-bulan yang

berikutan.

“Sebagai contoh, kadar inflasi berpurata hanya 0.3 peratus tahun ke tahun dalam 4 bulan pertama setelah pengenalan SST, berbanding purata inflasi yang lebih tinggi pada 2.4% dalam 4 bulan pertama setelah GST diperkenalkan pada 2015,” katanya.

**© 2019 Astro Awani Network Sdn. Bhd.  
(535275-D) All Rights Reserved.**

Source: <http://www.astroawani.com/berita-bisnes/ekonomi-2018-tumbuh-sihat-sebab-polisi-kerajaan-jelas-guan-eng-198701>